



守山閣叢書 史集



越

史

略



欽定四庫全書提要

越史略三卷不著撰人名氏紀安南國事上卷曰國初沿革爲趙佗以下諸王曰歷代守任爲西漢至石晉交州牧守姓名曰吳紀乃五代末吳權及其子昌岌昌文等事蹟曰十二使君乃昌文沒後牙將杜景碩等爭立事蹟曰丁紀則丁部領以下諸王曰黎紀則黎桓以下諸王中卷下卷皆曰阮紀則自李公蘊得國後諸王事蹟紀述特詳惟以李爲阮與史不合案黎則安南志略稱陳氏代立凡李氏宗族及齊民姓李者皆令更爲阮以絕民望則此書當爲陳氏之臣所作前志又載陳普嘗作越志黎休嘗修越志俱陳太王時人太王者陳日

賾之謚則此書或卽出普休二人手未可知也安南自漢迄唐並爲州郡五季末爲土豪竊據宋初始自立國此書自唐以前大抵全襲史文自戶部領以下則出其國人之詞與史所載殊有同異蓋史臣但承赴告之辭故如薨卒之類往往較差一年至名號官爵或祇自行國中而不以通於大朝故亦有所錯互其牴牾之處頗可與正史相參證又史稱陳日尊自帝其國尊公蘊爲太祖神武皇帝國號大越此書原題大越史略蓋舉國號爲名而所列公蘊至昊昌八王皆僭帝號不獨陳日尊一代則尤史所未詳又玉海記交趾天貺寶象神武彰聖嘉慶諸年號此書皆與相合特所列黎阮諸王無

不改元者而史家並未悉載則必當時深自諱之故中國不能盡知耳書末又載陳曰暝以下紀年一篇但錄所僭諡號改元而不具事蹟其中所稱太上者以史按之當爲陳叔明其稱今上者當爲陳煥而史載曰暝至煥十二世此書乃僅得十世未詳其故又考廉州府志紀康熙十三年海濱得鐘題皇越昌符九年乙丑說者疑爲宋時李乾德以後僭號今此書稱今上昌符元年丁巳當明洪武十二年其九年正值乙丑則爲陳煥僭號無疑是亦足資考證矣安南自宋以後世共職貢乃敢乘前代失馭之際輒竊號國中至著之簡策以妄自誇大實悖謬不足採然吳楚僭王春秋絕之而作傳者

亦不沒其實故特依僞史例錄之以著其罪且以補宋元二史外國傳之所未備焉

越史略卷一

四庫全書原本

守山閣叢書 史部

失名

金山錢熙祚錫之校

國初沿革

昔黃帝旣建萬國以交趾遠在百粵之表莫能統屬遂界於西南隅其部落十有五焉曰交趾越裳氏武寧軍寧嘉寧寧海陸海湯泉新昌平文文郎九真日南懷驩九德皆禹貢之所不及至周成王時越裳氏始獻白雉春秋謂之闕地戴記謂之雕題至周莊王時嘉寧部有異人焉能以幻術服諸部落自稱碓王都於文郎號文郎國以淳質爲俗結繩爲政傳十八世皆稱碓王越勾踐嘗遣使來諭碓王拒之周末爲蜀王子泮所逐而代之泮築城於越裳號安陽王竟不與周通

秦末趙佗據鬱林南海象郡以稱王都番禺國號越自稱武王時安陽王有神人曰臯魯能造柳弩一張十放教軍萬人武皇知之乃遣其子始爲質請通好焉後王遇臯魯稍薄臯魯去之王女媚珠又與始私焉始誘媚珠求看神弩因毀其機馳使報武皇武皇復興兵攻之軍至王又如初弩折衆皆潰散武皇遂破之王銜生犀入水水爲之開國遂屬趙

趙紀

武帝

諱佗姓趙氏漢真定人秦始皇三十二年已併天下略定揚粵以任囂爲南海尉佗爲龍川令至二世時囂死以佗代囂秦滅佗并有桂林象郡之地自立爲南越王漢高祖旣定天

下遣陸賈奉璽綬往拜佗爲南越王漢高后五年王自卽皇帝位發兵攻長沙招撫甌駱閩粵皆屬焉有地東西萬餘里御黃屋左纛漢文帝立復遣陸賈遺書問之賈至王慚謝請復爲藩王長供貢職至漢武帝建元之年薨謚曰武帝在位十八年孫胡立是爲文王

文王

諱胡武帝孫也漢武帝時嘗遣子嬰齊入侍後王薨謚曰文王子嬰齊立是爲明王

明王

諱嬰齊文王子也初爲太子入宿衛於漢在長安娶穆氏女生子興及文王薨至是卽位立穆氏爲后興爲太子漢元鼎

四年王薨謚曰明王子興立是爲哀王

哀王

諱興明王子也初卽位尊母樛氏爲太后太后未嫁於明王時嘗與霸陵人安國少季通及卽位漢遣少季來諭王入朝太后復與少季通遂勸王入朝其相呂嘉數諫止王王不聽太后恐嘉不從置酒欲誅嘉嘉知之陰與大臣謀作亂漢武帝聞嘉不聽乃使韓千秋等將兵二千人以攻嘉嘉乃與其弟及國人攻弑王及太后盡殺漢使者迎明王長子術陽侯立之而諡曰哀王

術陽王

諱建德哀王庶兄也元鼎五年十一月其相呂嘉出兵擊韓

于秋等盡殺之函封漢使節置境上元鼎六年漢以路博德爲伏波將軍出桂陽下湟水楊僕爲樓船將軍出豫章下橫浦以歸義侯二人爲戈船下瀨將軍出零陵下瀨水馳義侯因巴蜀罪人發夜郎兵下牂柯江同會番禺以攻嘉嘉及王遁入海博德使人追之擒王及嘉時戈船下瀨兵未下而越地已平矣遂分其地爲九郡南海蒼梧今梧州鬱林合浦今廣州

交趾九真

今清化府

日南

今又安府

珠崖儋耳

今儋州

歷代守任

石戴漢武帝時人

周章漢昭帝時人

魏朗子明漢宣帝時人

蘇定漢光武帝時人

馬援

後漢光武建武十六年麤冷縣人徵側雒將之女也嫁爲朱
焉縣人詩索妻性甚雄勇所爲不法太守蘇定繩之以法側
怒乃與其妹貳起峰州兵攻陷郡縣九真日南皆應之略定
漢南外六十五城自立爲王都麤冷十七年漢拜馬援爲伏
波將軍以擊之十八年援緣海而進隨山刊道千有餘里至
浪泊上與側戰側不能支退保禁溪十九年側益困遂走爲
援所殺追擊其餘黨至居風降之乃立銅柱爲極界分其地

爲封溪望海二縣援又築爲繭城其圓如繭二十二年秋援還漢

周敞順帝時爲刺史

張喬

順帝永和三年象林蠻區憐反攻殺長吏以喬爲刺史喬至慰諭並皆降散

夏方

桓帝延熹三年九真復反拜方爲刺史冬十一月賊衆二萬餘人皆來降

劉操桓帝時人

周喁靈帝時人

朱儻

靈帝光和四年夏四月烏滌蠻爲亂州人梁龍等因之以反有衆數萬人帝命儻擊破之以儻爲刺史

賈琮

靈帝中平元年州人屯兵執刺史帝以琮爲刺史琮至爲撫輯之州境乃安百姓歌曰賈父來晚使我先反今見清平吏不敢飯琮任事三年拜爲議郎

阮進漢中平中爲刺史

士燮

燮字彥威蒼梧廣信人父賜桓帝時爲日南太守燮少遊學漢東好左氏春秋爲之註解又通尚書大義父喪闋舉茂材

除巫令遷交州太守謙恭下士漢避亂者多往依焉獻帝聞其賢賜璽書褒諭以爲綏南中郎將領交州太守如故建安末燮遣子庶質於吳又以珠貝犀象及香果之珍美者遺孫權權嘉之封龍編侯弟三人壹鮪武並爲郡長燮旣學問優博又達於從政處大亂之世保全一方二十餘年疆場無事民皆樂業威尊無上出入鳴鍾磬備禮儀笳簫鼓吹闔咽道路嘗有數十妻居輜中當時貴重威震南蠻尉佗不足數也魏黃初七年王薨壽九十在治四十餘年孫權聞王死析合浦以北屬廣州呂岱爲刺史合浦以南爲交州戴良爲刺史以陳時代王爲太守王子徽等發兵共拒良後呂岱皆以計誅之傳首武昌